

TOTIHITAWĚ THAMOTIMA THE Ā

PREÁMBULO

Enaha thē puhi tao kuaai, wā rēamai thē, peheti he usukuwē thē, wā toprao thē kái, hei thē pē nohi taemopou piyēkou, īhī thē pē nohi īhīpimopouha totihitawē thamotima thē hami he usukuwē thē pē nohi taeayou totihitaopē,

Enaha thē puhi tao kuaai, totihitawē thamotima thēni thē taimi ha, thē pē kái shomiaprai ha, hei wārītiwē thamotima thē kipi thaprarema. Komi pēmaki rē kui pēmaki kirihou mai, pēmaki kái no preaa mai pēmaki pērihou piyēkopē, pēmaki ā topraopē, pēhetiapramotima thē pē hami.

Enaha thē puhi tao kuaai, totihitawē thamotima thē rē wā nosie huamotima thēni thē nohi thapopē, komi urihitheri thē pē no yuayou maōpē,

Enaha thē puhi tao kuaai, thē pē pērihiwē rē piyēkēi thē pē puhi taamayōpē thē pē rīmimayōpē,

Enaha thē puhi tao kuaai, komi urihitheri ONU thē ha thē pēhetiapraihe, totihithawē thamotima thē hami, suwē wāro pei pēmaki no rē kui thē pē no ā hē usukuwē, kama pēni thē ā wawemarēmahē thē pē puhi rē taamaīwēi,

Enaha thē puhi tao kuaai, komi urihitheri pē rē kui ONU thē iha thē pē ā wawētokema totihitawē thē ā nosi riā ha poheni,

Enaha thē puhi tao kuaai, thē pē ā rē wawētokenowēi thē pēni thē ā hīriapehe thē ā nosi kái popehe

Īhī thē no ā ha TOTIHITAWĚ THAMOTIMA THE Ā wēyēi piyēkouhe.

Hetipētēwē 1

Kōmi thē pē rē pēriprawē rē piyēkēi, he usukuwē thē pē keprou ai thē ā rēamaihā no ā heparohowē, totihitawē thē pē riā rē thaiwehei hami, thē pē puhi tao kái pērihiwēha, thē pē puhi kái katehewēha hawē kama thē pē mashi shīro pērihimopē.

Hetipētēwē 2

Kōmi thē pē ihami totihitawē thamotima thē kuprawē , thē ā rē maiha thē pē pēriprawē, wā katehano thēni thē wāhā no wayoano, suwē, wāro, pei kahi, thē pē rē reahumouwēi, napē thē ā, no matohipi, no preaarewē, thē pē rē kepronowēi hami, ai thē pē sho, shomi urihitheri himayōumahēi.

Kōmi thē pē ihami totihitawē thamotima thē kuprawē , thē ā rē maiha thē pē pēriprawē, ma kui ai thē pēni thē pē urihipi rēpoumakuhei thē pē riā pērio toprao he yatio.

Hetipētēwē 3

Yāmi kōmi thē pē ihami totihitawē thamotima thē kuprawē thē pē rē pēriaiwei thē pē kuprawē, ai thē ā rēamai, peheti thē pē rē pēriaiwei.

Hetipētēwē 4

Ai thē pē iha horemou wamaki no ohotamopi mai, horemou ohotamomamotima thē thamai puhioimi he parohowē.

Hetipētēwē 5

Thē pē shēmou taomi, thē pē wāhā kái wārīhīthomamou taomi, thē pē shēmou wārītai taomi.

Hetipētēwē 6

Thē pē pēriprawē rē piyēkēi thē pē ihami totihitawē thamotima thē kuprawē, thē pē nohi riā hatukēmopou piyēkou.

Hetipētēwē 7

Wā nosie huamotima a hami, komi hititiwē thē pē he usukuwē, thē pē nohi kái thapou piyēkou. Hei wā katehano thē rē kui thēni, hititiwē wā nosie huamatima ani wārīhītho thamotima thē hami, thē pē he komi rupou piyēkou; wārīhīto thamotima thē hami thē pē no yuo maōpē.

Hetipētēwē 8

Komi hititiwē thē pē rē kui, thē pē payeriopē nohi thaporewē pata pēni, pē nohi rē hatukēawei kama urihithēri thē pēni , totihitawē thamotima thē wārīhītho thai maōpehe.

Hetipētēwē 9

Enaha pētawē thē pē huēamou taomi, thē pē kái ōkamopou taomi ai thē urihi hami thē pē shimamou ayao taomi.

Hetipētēwē 10

Komi hititiwē thē pē ihami, totihitawē thamotima thē kuprawē, thē pē he pruka usukuwē, nohi thaporewē pata pē mithari hami, thē a riā hai thē a riā ha hīrīāmoni thē rē thanowēi thē hami thē wāhā no wēyēihe tēhē, thē no ā he riā ha ruoni.

Hetipētēwē 11

Hititiwē thē pē rē kui thē pēni ai thē ma thamonomai thē pē wāhāno wēyēihe tēhē thē pēhetiaprai haia maheīha thē shurukuamou haio taomi. Nohi thaporewē pata pēni thē pēhetiaprai haia maheīha pē noa napēmou taomi.

Thē pē wāhāno wēyēyono ma mai, thē pē wāhāno wēyēyou, enaha thē thamou taomi. Hapa hote wārītiwē thē ani hei tēhē thē wārītiwē he parohowē thē thamou taomi.

Hetipētēwē 12

Ai thē puhi pētouha ayaroni , thē pē yahipi hami, thē he haprou ayou taomi, therihē pē ihami kái, ōniōni a shimaihe tēhē thē kái mii pario ayao taomihe, komi thē pē mithari ha wa thē wāhāno wēyēi ayao taomi. Īhī thē pē hami totihitawē thamotima thē rē kui wā nosie huamotima thēni thē pē nohi thapou piyēkou.

Hetipētēwē 13

Hititiwē thē pē ihami totihitawē thamotima thē kuprawē, ai thē ā rēamaihā thē pē riā huu piyēkou, wa thē nohi rē pēripouwei thē urihi ha thē pē kái riā shaponomou.

Hititiwē thē pē ihami totihitawē thamotima thē kuprawē īhī thē no āhā thē pē rē pērihiwē rē piyēkēi thē pē urihipi hami, thē pē kái riā huu, thē pē urihipi nohi kái rē pēriprai, thē pē urihipi nohi kái riā kōō mi yapao.

Hetipētēwē 14

Ai thē yapēkamahe tēhē, kōmi hititiwē thē pē ihami totihitawē thamotima thē kuprawē thē pē rē hithēpraamaiwēi a urihi ha, īhī ā hā thē pē ā riā toprao, shomi thē pē urihipi hami kái.

Hei a hami totihitawē thamotima thē rē kui thē wāhā pomou taomi thē kái puhipramou taomi, wā nosie huamotima nohi thaporewē pēni thē pē huēmamaihē tēhē peheti kōmi yapēkamotima thē pē hami pei thē hapa rē hupētarenowēhei thē pēni kái.

Hetipētēwē 15

Hititiwē thē pē ihami totihitawē thamotima thē kuprawē, kama urihi theri thē pē wāhā hirou katitou.

Thē puhi pētouha ayaroni kama urihitheri thē rē kui thē mapramai ayao taomi, totihitawē thamotima thēni hawē kama e thē wāhā riā hiroprou kuo.

Hetipētēwē 16

Wārō, suwē pē sho, kama huya thē pē riā rē toayouwei hami totihitawē thamotima thē kuprawē ai thē ā rēo taomi. Ai thē ā rēamaihā suwē , wāro pē sho thē pē riā toayou, kama theri thē pē wāhā hirou, reahumotima kama urihithēri, ihī thē pēni totihitawē thamotima thē hami thē pē ā rēo taomi, kama thē pē mashi riā kuprou. Shoati totihitawē thamotima thē ha thē pē ā riā top rao, thē pē toayou pario tēhē, thē pē ā top rao rē kuonowēi naha, thē ā riā top rao kuo shoao.

Kama kēkipi rē puhiiyouwei, peheti kēkipi riā toayou.

Kama thē pē mashi shīroni pē shapono praukamaihē ihī thē no āhā totihitawē thamotima thē rē kui, kama urihitheri thēni thē nohi thapouhe, kama thē pē shaponopi kāini.

Hetipētēwē 17

Hititiwē thē pē rē kui thē pē matohipi riā kuo, totihitawē thamotima thē ha, thē pē rē perihii hami kama thē pē urihipi riā rii kuomopotayou.

Pei thē puhī pētouha ayaroni thē pē matohipi riā rēmainihe thē pē rē perihii hami urihi ā kāi rēmai taomihe.

Hetipētēwē 18

Hititiwē thē pē rē kui ai thē ā rēamaihā totihitawē thamotima thē ha thē pē puhī tao kāi riā pērio, reahumotima thē hami, thē pē puhī katehewēha; totihitawē thamotima thē ha thē ā kāi koyokoa reahumotima wa thē riā rē hemihipraiwei, ai thē ā rēamaihā thē riā owēmamou komi thē pē mithari ha thē kāi riā owēmaihe, thē pē hirayou tēhē, thē pē owēmayōū tēhē, peheti thē ā huamou sharirou ha.

Hetipētēwē 19

Ai thē ā rēamaihā hititiwē thē pē rē kui yāmi thē pē puhī riā piyēkou, thē wāhāno riā rē wayoiawehei; ihā thē ā kāi koyokoa thē ā hai tēhē thē ā nohi wārimopou taomi, ma kui yaniki thē riā wārimou kuaahērii, thē ā riā opisi tēamou kuaaherii, thē ā riā wēyēmou piyēkou wānoshimamotima thē pē hami.

Hetipētēwē 20

Hititiwē thē pē ihami totihitawe thamotima thē kuprawē ai thē ā rēamaihā thē pē ā riā wayou kāi yototai thē pē riā rē thaiwehei thē pē wāhāno wayoihei ha.

Ai thēni yototamotima thē hami thē shimai ayao taomi.

Hetipētēwē 21

Hititiwē thē pē ihami totihitawē thamotima thē kuprawē patamorēwē thē pē rē kui thē pē ā wayou kāi riā roaai narēō kama peni a pata rē thanowēhēi pē mithari ha kāi.

Hititiwē thē pē ihami totihitawē thamotima thē kuprawē kama thē pē rē pēriprai hami thē ohotepi rē shatiprai, thē pē riā ohotamou toaai.

Patamorēwē thē pē rē kui, thē pē shaponopi kāi rē pēriowei thē pē iha thē pē patamou. Ei thē rē kui thē pē shaponopi kāi rē pēriowei thē peni thē pē wāhāno ha wayoaheni thē yaiprai shoaohe yaiamotima thē kuo tēhē thē pē yaiamou hāthōō.

Hetipētēwē 22

Hititiwē thē pē ihami totihitawē thamotima thē kuprawē kama thē pē rē pēriprai hami pata thē pēni thē pē nohi kāi hatukepopehe, ai urihitheri thē pē patani thē pē nohi kāi hatukēpopehē, thē pē puhī top ramapopehe, ihī thē nohi yaimopou thē pē puhī wetinahamou maōpē, peheti thē pē pērihopē.

Hetipētēwē 23

Hititiwē thē pē ihami totihitawē thamotima thē kuprawē, thē pē urihipi riā hupēo, ai thē ā rēamaihā thē ohote hurimopē, thē prewē thaporaheni, pata thēni ohotamorēwē thē pē rē kui thē pē nohi pēyēpou thē pē ohote kuo maō tēhē.

Hititiwē thē pē ihami totihitawē thamotima thē kuprawē, thē pē ohotamou he usukuwē rē kurenaha thē pē no kāi kōō he usukuopē.

Hititiwē thē pē ihami totihitawē thamotima thē kuprawē he husukuwē thē pē no kōō, thē pē puhī kāi owēhēo, kama pē shīro rē kui e pē puhī kāi pērio mi hetuopē e thēki peheriproimiha pē kāi rē pērioweini ai e thēki he riā tikēai e thēki he usukuopē.

Hititiwē thē pē ihami totihitawē thamotima thē kuprawē, sindicato thē pē riā thayou, thē pēhe rumopopē.

Hetipētēwē 24

Hititiwē thē pē ihami totihitawē thamotima thē kuprawē, thē pē washimi horuu yānikio pariopē, thē pē riā huu toatarou, top rao thē pē kāi rē ohotamonowēi thē no kāi riā kōāmamou thē ma yānikia parirani.

Hetipētēwē 25

Hititiwē thē pē ihami totihitawē thamotima thē kuprawē, thē pē riā pērio top rao kama theri thē pē shīro sho, nii pē hami, yahi pē sho, thē pē kāi temio top rao pē, thē pē kāi titihopē , thē pē nohi kāi rē yaimopouwei thē pē sho. Enaha hititiwē thē pē pehi totihitawē thamotima thē ha thē kua thē pē rē ohotamoumai, pē rē shawarapiwei, thē pē no rē huwēmai, thē pē he rē paharaprai, thē pē rē wārō rē patai, thē pē suwe kāi rē patai, ai thē pē wārītiwe kāini thē pē pehetipopehe.

Suwē shipēnapi thē pē rē kui, ihiru, marānapi, suwēhēri marānapi thē pē komi sho, totihitawē thamotima thēni, thē pē nohi thamopou top rao pē. Hititiwē ihiru hīpi kua pē rē keprouwei, pē hīpi ma kua mai pē kāi rē keprouwei, totihitawē thamotima thē kuprawē peheti pē nohi kāi thaprawē.

Hetipētēwē26

Hititiwē thē pē ihami totihitawē thamotima thē kuprawē, thē pē kāi hirayopē. Hiramotima thē pē rē kui, nomraiha thē pē hiramou pariopē. Hiramou pariotima thē hami thē pē ihrupi shimio he parohoopē. Hiramou pariotima thē nohā hami iha hititiwē thē pē ōnimou taai he parohoopē; ōnimou pata thē rē kui hititiwē thē pē pehi ma kui thē pē puhī moyāwei rē thē pē pehi shīro kuopē.

Hiramotima pē hami, puhī tao thē pē kupropē ihī thē no āhā totihitawē thamotima thē pē nohi asipopehe ai the ā rēamai thē sho; thē pē rē pēriprawē piyēkēi thē pēni, thē pē nohi kāi rē yaipouwehei thē pē hami, thē pē no ihīpipopehe, thē pē kāi puhipoyopē, O.N.U. thēni thē thamai rē puhiiwei thē ā riā praukamai ha piyēkoni, thē pē ā riā top ramapou ha totihioni.

Pē nūi, pē hīi thē pēni e thē hiramai shi rē top rao wehei e thē hiramai puhipehe.

Hetipētēwē 27

Komi hititiwē thē pē ihami totihitawē thamotima thē kuprawē, thē pē rē pērihii thē pēni thē pē rē tai rē piyēkouwehei thē pē hami ai thē ā rēamaihā, thē pē no riā taayou, thē pē a kāi riā top rao, matohi pē rē thanowēhēi pē hami, ihī thē pē matohi ha thē pē ā riā top rarou.

Hititiwē thē pē ihami totihitawē thamotima thē kuprawē , thē pē nohi thaopē, kama thē pēni thē pē rē thaiwehei thē pē hami, thē kāi rē ōnimaiwēhēi thē pē hami, noshiharirawē thē pē kāi rē kopemaiwēhēi hami kāi.

Hetipētēwē 28

Komi hititiwē thē pē ihami totihitawē thamotima thē kuprawē ai thē pēni thē ā rē thaiwehei, thē ā nosi popehe.

Hetipētēwē 29

Komi hititiwē thē pēni ohote thē huripehe kama thē pē shaponopi hami, ihī pē shapono hami top rao thē pē parahērii.

Totihitawē thamotima thē hami thē pē rē wapēoheriwei ai thē pē ihami totihitawē thamotima thē pē kāi kuprawē, ihī ei thēni thē nohi hatukēmapou totihitawē thamotima thē rē kui ai thē ā reamai thē sho. Mihi totihitawē thamotima thē hami peheti thē pē kuaahērii, yaiamotima thē hami thē pē rē patamou thē kuo tēhē.

Hei totihitawē thamotima thē rē kui ai thē ā kua mai thē pē sho O.N.U. thē rē kuuwei thē ā nohi wārīpou taomi.

Hetipētēwē30

Thē pē rē pērihouwei thē pēni, yototarewē pēni , ai yāmi thēni wa katehano thēni totihitawē thamotima thē wāhā no wēyēi ha ai thēni thē wāhā nohi taeai taomi, thē wāhā kâi hemihiprai ayao taomi.